

आकाशवाणी

खबरां जगमोहन शर्मा कोला,

पैहले खास-खास खबरां:-

1. प्रधानमंत्री नरेन्द्र मोदी होंरें प्रगति दी बैठक च ढांचागत परियोजनाएं दी समीक्षा कीती। टी.बी. मुक्त भारत अभियान ते साइबर अपराधे सरबन्धि विषे पर चेचा बिचार-बटांदरा कीता।
2. भारत च 1975 च लाई गेदी इमरजेंसी दे चेते च अज्ज संविधान हत्या दिवस मनाया जा'रदा ऐ, जेहदा मकसद नौजवान पीढ़ी गी लोकतांत्रित मुल्यें-कद्रें दी अहमियत समझने ते उसले होई दी संविधान दी अनदिकखी बारे जागरुक करना ऐ।
3. उत्तराखंड च लिपुलेख पास रस्तेया भारत-चीन सीमा बपार 6एं बरे बाद कल परतियै शुरू होने जा'रदा ऐ। 26 बपार पास जारी।
4. भारत दी मेजबानी च अज्ज ब्रिक्स दे ऊर्जा मंत्रिण दी 11मीं बैठक अज्ज Gurugram च लग्गै करदी ऐ।
5. केन्द्री उद्योग ते बपार मंत्री पीयूष गोयल CETA समझौते दे लागू होने कोला पैहले त्रंऊ दिनें दी लंदन यात्रा पर जा'रदे न। DCC सम्मेलन च बी हिस्सा लैडन।
6. मौसम विभाग नै उत्तर भारत दे केई राज्यें च अज्ज भारी बरखा दी पेशनगोई कीती दी ऐ।

<><><><><><>

ते हून खबरा विस्तार कन्नै:-



PM- Pragati

प्रधानमंत्री नरेन्द्र मोदी होरें कल नमीं दिल्ली च प्रगति दी 52मीं बैठक दी अध्यक्षता कीती, जेहदे च सिड़क, बिजली, ओद्योगिक कारीडोर ते मेट्रो रेल क्षेत्रें दी लगभग 30 ज्हार करोड़ रपे दी 4 प्रमुख बुनियादी ढांचा परियोजनाएं दी समीक्षा कीती गई। प्रधानमंत्री होरें आखेआ कि परियोजनाएं च चिर लग्गने कारण लागत बधदी ऐ ते लोकें गी समें पर उन्दा लाह नेई थोई सकदा। उ'नें मंत्रालयें ते राज्य सरकारें गी बकाया पेदिएं समस्याएं दा तौले नबेड़ा करने ते परियोजनाएं दी बकायदी कन्नै निगरानी यकीनी करने दे निर्देश दिते। बैठक च टी.बी मुक्त भारत अभियान दी बी समीक्षी कीती गई। प्रधानमंत्री होरें तपेदिक उनमूलन लेई A.I दे इस्तमाल पर जोर दिता ते NCC कैडेटें ते My Bharat स्वयंसेवकें गी जनजागरूक अभियान कन्नै जोड़ने दा बी सुझाव दिता। मोदी होरें साइबर अपराध ते डिजिटल गिरफ्तारी कन्नै जुड़ी दिएं शकैतें दी बी समीक्षा कीती। उ'नें साइबर धोखाधड़ी दी रोकथाम, शकैतें दे तुरत नबेड़े ते एजेंसिएं बशकार बेहतर तालमेल पर जोर दिता ते बच्चें गी आखेआ जे ई-जीरो FIR बवस्था लागू करने दी दिशा च कम्म करन।



VP Book

उपराष्ट्रपति सी.पी. राधा कृष्णन होरें कल नमीं दिल्ली च VIP कल्चर बारे इक कताब दा विमोचन कीता जिसी अरुणाचल प्रदेश दे साबका सांसद नबाम रेबिया ते संदीप कुमार हुंदे आसेआ लिखेआ गेदा ऐ। इस कताब च सरकारी संस्थानें ते आम लोकें

बशकार दे छिंडे गी उजागर कीता गेदा ऐ ते इस गल्लै पर बी जोर दिता गेदा ऐ कि लोकतंत्र तांगै फली-फुल्ली सकदा ऐ जिसलै सार्वजनिक ओहदें गी विशेष अधिकार देने दे बजाए इक जिम्मेदारी दे रुपै च दिक्खेया जा। विमोचन समारोह दौरान उपराष्ट्रपति होरें प्रधानमंत्री मोदी हुंदे उस खोआन गी बी चेता कीता जेहदे च उ'नें आखेआ कि हर भारती खास ऐ ते हर भारती VIP ऐ।

<><><><><><>

Modi Armenia

प्रधानमंत्री नरेन्द्र मोदी होरे आर्मेनिया दे प्रधानमंत्री निकोल पाशिन्यान ते उन्दी पार्टी गी हाल च होए दे संसदीय चुनाएं च जित लेई बदाई दिती ऐ। दौनें नेताएं बशकार फोन पर गल्लबात होई। प्रधानमंत्री मोदी होर पश्चिम एशिया दी हालिया परिस्थितिएं बशकार ईरान च फसे दे भारतीय नागरिकें दी निकासी च सहयोग आस्तै आर्मेनिया दा आभार जताया। दौनें नेताएं बपार, रक्षा, प्रोद्योगिकी ते लोकें बशकार सम्पर्क जनेह खेत्रें च दपक्खी सहयोग गी होर मजबूत बनाने दी प्रतिबद्धता दोहराई।

<><><><><><>

Samvidha Hatya Diwas

मुख्य भरै च अज्ज संविधान हत्या दिवस दे मौके पर केंई चाली दे कार्यक्रमें दा आयोजन करियै उस ध्याड़े गी चेता कीता जा'रदा ऐ। अज्जै दे रोज 1975 गी मुख्ये च अपातकाल यानि इमरजेंसी लाई गई ही। इस ध्याड़े गी भारतीय लोकतंत्र दे इतिहास दे सब्भनें शा सयाह अध्याय दे रुपै च चेता कीता जंदा ऐ, जिसलै लोकें कोला उन्दे बुनियादी अधिकार खुस्सी लैते गे हे ते प्रेस दी अजादी गी बी खत्म करी दिता गेआ

हा। इस ध्याड़े उ'नें लोके गी बी चेता करदे होई श्रद्धांजली भेंट कीती जंदी ऐ जिनें इमरजेंसी दे दौर च केई जुल्म ज्यादातिएं दा सामना कीता। मुल्खै च अंदरुनी गड़बड़ियें ते चुनौतिएं दा हवाला दिंदे होई 25 जून 1975 च उस, बेल्ले दे राष्ट्रपति फखरुद्दीन अली अहमद होरें संविधान दी दफा 352 तैहत मुल्खै च इमरजेंसी दा ऐलान कीता हा। उस समें मुल्खै दियां प्रधानमंत्री सुर्गवासी इंदिरा गांधी हियां ते मुल्खै च उन्दे खलाफ बने दे माहौल करी हालात पर काबू पाने लेई इमरजेंसी लागू कीती गई ही। इस ध्याड़े गी मनाने दा मकसद नौजवान पीढ़ी गी एह दस्सना बी ऐ कि किस चाली इस दौर च संविधान गी अनिदक्खा करदे होई सत्ता दा गलत इस्तमाल कीता गया हा।



India –China Traders

उत्तराखंड दे पिथौरागढ जिले च स्थित लिपुलेख दर्रे थमां भारत-चीन सीमा बपार 6 बरे मगरा परतिए शुरु होने जा' रदा ऐ। कल 26 भारतीय बपारियें दा पैहला दल तिब्बत क्षेत्र च प्रवेश करोग। इस दल च 17 बपारी ते 9 सहायक शामिल ऐ। घारचूला दे उप-जिला अधिकारी ते बपार अधिकारी आशीष जोशी होरें दस्सेआ जे बपार गी सखल्ला बनाने आस्तै गुंजी च सीमा शुल्क कार्यालय खोलेआ गेआ ऐ। बपारियें अपना समान पैहले गै लिपुलेख दर्रे कश स्थित गोदाम च पजाई दिते दा ऐ। प्रशासन गी 103 थमां मते बपारिएं दे आवेदन हासिल होए ते तौले गै 25 बपारिएं दे दुए दल गी बी पास जारी कीते जाडन।

भारत-चीन बश्कार बपार 1991 च परतिए शुरु होआ पर कोविड-19 करी इसी 2025 तगर स्थगित कीता गेआ हा।



India -BRICS

भारत अज्जै थमां ब्रिक्स अध्यक्षता 2026 तैहत हरियाणा दे गुरुग्राम च 11मीं ब्रिक्स ऊर्जा मंत्रिणं दी बैठक दी मेजबानी करगो। एह बैठक कल तगर चलोग। बैठक च त्रै प्रमुख प्राथमिकताएं पर चर्चा कीती जाग, जेदे च ऊर्जा- सुरक्षा ते स्थिरता ऊर्जा दा इस्तेमाल ते बरोबरी ते प्रोद्योगिकी ते नमियां काहड़ां शामिल न। ऊर्जा सुरक्षा- स्थिरता ते नवाचार पर सहयोग गी मजबूत करने आस्तै सारे 11 ब्रिक्स सदस्य मुखे दे ऊर्जा मंत्री ते वरिष्ठ अधिकारी इस बैठक च हिस्सा लैगन।



Goyal CETA

केन्द्री उद्योग ते बपार मंत्री पीयूष गोयल अज्जै थमां त्रंऊ दिनें दी यू.के यात्रा पर लंदन जा'रदे न। इस यात्रा दा मुख मकसद भारत यू.के बशकार व्यापक आर्थिक ते बपार समझौते जिसी CETA दे नां कन्ने जानेआ जंदा ऐ गी 15 जुलाई थमां लागू करने शा पैहले इसी खीरी रुप देना ऐ। एहदे इलावा ओ डी.सी.सी. यानी दौरे अंशदान सरबन्धि सम्मेलन च बी शिरकत करगन। CETA समझौते तैहत लगभग 99 प्रतिशत चीजे पर लग्गने आहले टैरिफ शुल्क खत्म होई जाहगन, जेहदे नै भारती निर्यातके, कारीगरे ते करसान गी ब्रिटेन दे बजारे तगर सिद्धी पुज्ज हासल होई सकोग। तौंआई दोहरे अंशदान सम्मेलन कन्ने बरतानिया च आरजी तौरा पर कम्म करने आहलें 75 जहार कोला मते भारतीय पेशेवरें गी फैयदा थ्होग ते उनें'गी भारत ते बरतानिया दौनें थाहरें समाजी सुरक्षा सरबन्धि रकम दी दोहरी अदायगी नैई करनी पौग।



IMD Weather

मौसम विभाग नै अज्ज कर्नाटक दे तटीय क्षेत्रें/झारखंड/कोकण ते गोवा/ महाराष्ट्र/ तेलंगाना/ओडिशा/ उप-हिमालयी पश्चिम बंगाल ते सिक्किम च भारी बरखा दी संभावना जताई ऐ। मौसम विभाग मूजब बिहार/ झारखंड/ पश्चिम मध्य प्रदेश/ पश्चिम राजस्थान/ मध्य महाराष्ट्र ते मराठवाड़ा च तेज अंधी-झकखड़ ते गरज कन्नै बरखा होई सकदी ऐ। अगले 2 थमां त्रै दिनें दौरान दिल्ली / पंजाब/ हरियाणा/ उत्तराखंड ते पूर्वोत्तर क्षेत्र दे किश हिस्सें च गरज, बिजली ते तेज हवाएं कन्नै बरखा दा अनुमान ऐ।

तौआई अंडमान निकोबार द्वीप समूह/ आंध्र प्रदेश दे तटीय क्षेत्रें/ छत्तीसगढ़/ विदर्भ/ ओडिशा / तेलंगाना/ तमिलनाडू/ पुद्दुचेरी/ पश्चिम बंगाल ते सिक्किम च बी इस्सै चाल्ली दा मौसम बने दा रेई सकदा ऐ। मौसम विभाग नै अज्ज बिहार/ पूर्वी मध्य प्रदेश ते पूर्वी उत्तर प्रदेश दी किश थाहरें पर लू चलने दी बी संभावना जाहिर कीती ऐ।

